

2.3 Opnunargjald:

Hafi gjald samkvæmt gjaldskrá þessari eigi verið greitt, svo að til lokunar hafi komið fyrir veitu, skal taka gjald fyrir opnun kr. 1 040,00 (1.295)
fyrir sendingu lokunartilkynningar kr. 500,00 (623)

2.4 Um dráttarvexti:

Rafveitunni er heimilt að reikna dráttarvexti á vangoldna rafmagnsreikninga eins og dráttarvextir eru reiknaðir á hverjum tíma, enda hafi tilkynning um beitingu dráttarvaxta verið send notanda með reikningi eða á annan hátt.

2.5 Virðisaukaskattur:

Virðisaukaskattur bætist við öll gjöld samkv. gjaldskrá þessari. Gjöld að viðbættum virðisaukaskatti eru sýnd innan sviga.

2.6 Breytingar á gjaldskrá:

Heimilt er að breyta gjaldskrá þessari til samræmis við verðbreytingar, að fenginni staðfestingu iðnaðarráðuneytisins, enda miðast gjaldskráin við það, að tekjur rafveitunnar standi undir rekstrargjöldum hennar svo og aukningu veitukerfisins.

Gjaldskrá þessi staðfestist hér með samkvæmt vatnalögum nr. 15 20. júní 1923 og orkulögum nr. 58 29. apríl 1967 til að öðlast gildi 15. febrúar 1993, og birtist til eftirbreytni öllum sem hlut eiga að máli. Jafnframt er úr gildi felld eldri gjaldskrá sama efnis nr. 511, 24. október 1991.

Iðnaðarráðuneytið, 9. febrúar 1993.

F. h. r.

Björn Friðfinnsson.

Steinunn Bjarmann.

REGLUGERÐ

um innheimtu og ráðstöfun á verðskerðingargjaldi af hrossa- og nautgripakjöti.

1. gr.

Greiða skal 2% verðskerðingargjald af öllu hrossakjöti og 5% af öllu nautgripakjöti. Skal gjaldið dregið af verði til framleiðenda eins og það er ákveðið af Verðlagsnefnd búvöru (sexmannanefnd).

2. gr.

Framleiðsluráð landbúnaðarins reiknar verðskerðingargjaldið samkvæmt sláturskýrslum afurðastöðva og annast innheimtu gjaldsins og vörslu þess. Afurðastöðvum er skylt að standa Framleiðsluráði skil á skýrslum um alla slátrun nautgripa og hrossa og alla ráðstöfun kjötsins.

Framleiðendum hrossa- og nautgripakjöts sem selja kjötið án milliliða til neytenda eða smásöluaðila ber á sama hátt að skila Framleiðsluráði landbúnaðarins skýrslu um alla ráðstöfun kjötsins.

3. gr.

Verðskerðingargjaldið greiðist af afurðastöðvum eða framleiðendum ef um beina sölu er að ræða. Gjaldldagi skal vera 25. hvers mánaðar vegna næstliðins framleiðslumánaðar, fyrst 25. mars 1993. Sé gjaldið ekki greitt innan mánaðar frá gjaldldaga skal innheimta dráttarvexti af því sem gjaldfallið er. Dráttarvextir skulu reiknast hinir sömu og hjá innlánsstofnunum, skv. ákvörðun Seðlabanka Íslands á hverjum tíma.

4. gr.

Ef gögn um viðskipti með gjaldskyldar afurðir þykja að mati Framleiðsluráðs ófullnægjandi eða gjaldskyldur aðili skilar ekki skýrslum skv. 2. gr. skal Framleiðsluráð skora á viðkomandi aðila að bæta úr því innan ákveðins tíma og láta í té skriflegar skýringar og gögn. Fáir Framleiðsluráð fullnægjandi skýringar og gögn innan tiltekins tíma skal gjaldið ákvarðað og innheimt í samræmi við þau.

Berist svar við áskorun skv. 1. mgr. ekki innan tiltekins tíma eða ef skýringar eða gögn eru ófullnægjandi, er Framleiðsluráði heimilt að áætla gjaldið og innheimta það skv. þeirri áætlun. Senda skal skriflega tilkynningu til greiðanda gjaldsins um áætlunina. Telji greiðandi áætlunina ranga, getur hann innan 20 daga frá og með póstsendingardegi tilkynningar um áætlun gjaldsins krafist þess skriflega að Framleiðsluráð taki áætlunina til endurskoðunar. Skal sú krafa rökstudd með söluskram eða öðrum nauðsynlegum gögnum. Framleiðsluráð skal innan eins mánaðar frá lokum þessa frests gera greiðanda skriflega grein fyrir afgreiðslu á kröfu hans. Heimilt er greiðanda að skjóta lokaafgreiðslu Framleiðsluráðs til landbúnaðarráðherra og skal skrifleg og rökstudd beiðni þar um hafa borist ráðherra innan 30 daga frá póstlagningu lokaafgreiðslu.

Beiðni um endurskoðun á áætlun gjaldsins eða deila um gjaldskyldu frestar ekki eindaga né leysir undan neinum viðurlögum, sem lögð eru við vangreiðslu þeirra. Ef gjaldið er lækkað samkvæmt afgreiðslu Framleiðsluráðs eða úrskurði ráðherra skal endurgreiðsla þegar fara fram.

5. gr.

Skylt er Framleiðsluráði að halda innheimtu verðskerðingargjaldi sérgreindu eftir afurðategundum og skal gjaldinu varið til markaðsaðgerða fyrir hrossa- og nautgripakjöt, bæði hér á landi og erlendis. Framleiðsluráð skal fyrir 1. mars 1993 gera áætlun um tekjur af innheimtu verðskerðingargjalds á gildistíma reglugerðarinnar og ráðstöfun þess. Jafnframt skal Framleiðsluráð endurskoða álagningarþörf verðskerðingargjalds og skal því lokið fyrir 1. ágúst 1993.

Hvers konar ráðstöfun á tekjum af verðskerðingargjaldi skal vera háð samþykki landbúnaðarráðherra.

6. gr.

Reglugerð þessi, sem sett er samkvæmt heimild í lögum nr. 112/1992, sbr. lög nr. 5/1993 um breytingu á lögum nr. 46/1985 um framleiðslu, verðlagningu og sölu á búvörum, skal öðlast þegar gildi og gilda til 1. september 1993.

Landbúnaðarráðuneytið, 8. febrúar 1993.

Halldór Blöndal.

Jón Höskuldsson.